

皇明嘉隆疏抄

兵科給事中臣趙漢謹

題為亟處倖臣以保新政事臣聞我

太祖嘗曰壅蔽於言者禍亂之萌專恣於事者權奸之漸嚴戒辭豈非百世嗣皇所宜慎思而深畏者哉是故國無權奸禍亂何由而作朝無壅蔽專恣安得而容故將擅政者必先問於言言不足以通上下之情而其奸以售其權以攬禍亂始矣夫方其竊弄之初不過便已之私逞已之勝而已上挾制令下拒人言至於自知不免則騎虎之勢不亂不止況夫勢之所在爭附者衆故奸不獨成亦黨之者成之耳臣觀近日

習倖之臣根據於

陛下左右其間擅政如太監崔文者日漸以長尚可  
不豫處之乎今論文之罪者不止以十計頻煩  
勅旨不曰已有旨了則曰該衙門知道回

天之力若無如柰之何者臣曷不憚煩而復以為言  
正以 聖明受其壅蔽忽其專恣行道之人皆  
知其亂撓 新政之首而 朝廷獨未知耳臣  
竊見

陛下繼統以來納言如嚮從善如流苟有一得之愚  
陳於前者必嘉其言之有理而舉行之

玉音在耳何光且大也而今者以文之故致使

命令漫出不厭衆心豈

陛下知而顧爲之哉蓋文之力能展轉矯詐致此也  
且睿覽於論文之疏果一一得而悉之乎抑  
止見其略節也如止於其略節者見之安知不  
有黨文者爲文妄匿被劾之條洗索言者之過  
以激聖情之喜愠乎又安知其不覘見

聖情護成前旨且以諛

陛下爲優容以防

陛下之見疑乎夫謂已有旨則文之罪不必諸人之  
再言謂該衙知道則人之罪已逃

一人之獨斷此即文之挾皇命拒人言以諱已罪

其為雍蔽可謂甚矣若文之所專恣者豈特此一廝役李陽鳳而已邪李陽鳳之事不甚大而文快心之大者在能矯詔獄以制人在能制尚書以回詔在能加言官以奏擾臣恐充其勢蓋不亂不已也近者相傳初工部尚書趙璠准呈發文家人之罪文疾之輒捕告人痛杖幾死叱之去曰此杖寄與趙尚書的文之作威無狀至此則其呼此大臣如正德年間劉瑾之為者不患其不能為也是以再干勅旨責林俊以違旨以試於後也俊何人也而文敢誤陛下幾罪一耆舊邪此皆其雍蔽之深而

朝廷之上有所不得而知者也臣請

陛下俯察臣言念臣非筆文也不忍

新政亂於文也不忍

皇上粹質茂年誤中文間而有過舉也由臣言之誅  
文以慰人心可也如

皇上好生之德為文求全請亟賜斥逐使之遠去  
左右則所以庇文者

恩莫大焉文不斥人言不已文必執迷自固臣恐權  
奸之禍無日矣

嘉靖二年五月十四日奉

聖旨該衙門知道

刑部廣西清吏司主事臣楊永祐謹

奏為斥奸佞杜深患以隆治化事臣備員法曹歷事三年所理斷惟民間鬪毆姦盜事是皆冗瑣末節未足深究獨恨國有大姦根據

君側關生民之利害繫社稷之安危履霜堅冰不可不早為之慮也昔漢臣張綱奉使州郡理輪洛陽都亭曰豺狼當路安問狐狸遂劾奏大將軍梁冀河南尹雋不疑恣肆貪叨條其無君十五事臣嘗仰慕其人之手采今為法司官乃坐視朝廷巨惡元兇而不敢發一言以正其罪惟日求民間之小疵臣誠赧赧然有尸位素

餐之羞是以不顧利害敢昧死為

陛下言之恭惟

陛下嗜學好問昔在藩邸時蓋已傳之四方

登極初年委任元老耆輩粹端殆十之八或者又謂

從龍諸臣如今司禮監太監張佐等多練達

廉靜之人可與共成化理也黃童白叟莫不延

頸以望太平之治柰何不一二年內臣崔文周

用田頤蔡秀諸群小伺隙投間首倡左道蠱惑

聖心建設齋醮宮無虛日彼數人必曰為

陛下求長生之術而

陛下以為宮中事無與於朝政可無害也昔舜



年百有十歲文王九十有七未聞有此秦始皇  
求仙海島不免沙丘之亡漢武帝比昵方士徒  
招晚年之悔宋徽宗事道教當時王志老王仔  
昔林靈素等群起而迷之卒召此虜之禍至今  
談者猶恨

陛下試詰崔文等歷數秦漢以後之帝王事道教為  
仙者誰邪不惟不能為仙而保享於太平無虞  
者又誰耶臣固知其無他彼輩不過為要

君固寵榮身肥家之策耳不知天下大事皆由此而  
壞蓋邪正不兩立出乎此則入乎彼其機漸不  
可長大臣料首交章論列皆忠困成旦為

國深計者

陛下每日知道了而群小之胡為自如也故崔文自以為得君既專莫有能捍之者矣遂肆行無忌縱放家人李陽鳳多索工價科取城夫有身在工所而地方又以夫征錢者怨咨載道側目以視輦轂之下而有此良可畏也是以廣東道御史劉黼發其奸工部尚書趙璜移咨刑部拘執李陽鳳等追究情狀為崔文者正當痛悔往失具奏認罪以逭萬一之誅柰何恃

寵驕恣巧言飾詐奏奉駕帖取刑部人而付之鎮撫司正恐奸貪敗露而為脫免之計也刑部尚

書林俊執法不與蓋亦漢臣張釋之之忠於文帝耳釋之為廷尉罰犯蹕者金帝欲加重而不肯易棄盜環者於市帝欲族誅而未之從雖申屠嘉辱寵幸之鄧通帝且遣使謝焉然則文帝非為臣所屈也為天下伸法也桃應問曰舜為天子臯陶為士瞽瞍殺人則如之何孟子曰執之而已矣言舜雖愛親不敢撓臯陶之法今刑部按治一內豎家人未正諸法而竟奪之鎮撫司夫林俊即

陛下士師廷尉之官也

陛下以其官任之而不容其守法何用是官之為哉

必崔文巧佞譖愬曰

陛下明旨林俊且敢抗故林俊不惟不得執法且冒  
違 旨之罪崔文巨姦至是愈不可遏矣俊經  
術學義久為士人師範家居十餘年

陛下特起而用之可謂知遇矣一旦崔文以私意阻  
撓林俊且爾况其他又孰敢有發其奸以回

天意者乎鎮撫司平素受制內臣承望崔文風指不  
暇又豈敢直陽鳳之罪以昭 國法乎此不待  
智者而知其必不然也使

陛下法不信於天下取譏後世有愧於文皇帝  
崔文為之也即文之所為藝德

宮闈蠱惑

君父縱放家人扼拊卿相凡此皆人臣之大惡而文  
兼有之又不自以為罪方且假仗

主威挾制中外揚揚焉夏無忌憚是何異於逆瑾在  
先帝初年也耶瑾初詭謀秘計以要

君寵而乘隙伺機以中縉紳之禍然後天下之權悉  
屬之瑾幾危社稷遺禍徧天下歷數年而始

定臣恐崔文不去終非國家之利周用田頌  
蔡秀相與朋比植根膠固皆不可不早為之慮  
也臣不勝犬馬愛君之誠輒敢事為之說而  
昧死以獻伏惟

陛下曲加容貸 留神省覽 奮發剛斷 一正宸  
心乞 勅司禮監按崔文并周用田顯蔡秀左  
道憲君之狀進諸殊域無為 君側之害必款  
昭布天下付法司以正其罪則又義舉也仍  
勅鎮撫司將李陽鳳等務求科索實情從公奉  
請必付法司擬罪庶幾 國體不至盡壞而小人  
欺罔之端亦可少塞也臣無任激切戴罪之至  
嘉靖二年五月十一日奉

聖旨該衙門知道

禮科給事中臣劉景謹

題為乞除大奸以正大法事臣惟自古人君雖不能不用臣而用之必慎所擇苟非其人則譸張詭異足以懷君德朋黨奸惡足以成國禍故君側之惡古以為患而毒藥猛獸之喻賢士垂切戒焉仰惟

陛下聰明天授洞燭事機即位之初首竄前朝元惡有所委任必擇淳良由是聖德昭明天下稱誦柰何一日壞之於一么麼之崔文臣按崔文身素卑微驟居近侍恩榮莫逾不知感恩揣分乃敢首導

陛下於有過之地法宮深嚴恣為齋醮言官論劾  
陛下一切不省近聞指此為名動支

內帑銀六七萬兩任意侵剋司禮監既不奏聞  
陛下亦惟付之不知 內帑之藏 累朝積蓄國家  
命脉所寄文視為已藏而攘取之陰耗國本其  
罪彌彰且憑恃寵靈折法司之囚折正宮之氣  
使天下謂

陛下庇邪豎拂大臣以上累

清明之德文實啓之不諫文不知

陛下何辭以謝天下臣竊惑焉臣又訪知今提督東  
廠太監芮景賢性雖恬靜任用匪人如千戶陶



淳心性險惡衆所素知藉用牙爪積年兇狡箝網良善細隱莫遺外以酒食結縉紳而陰圖彌縫其惡前給事中間閔御史曹嘉素惡之不與交通則因事以文致其罪由是黨錮勢盛無敢言者近聞於陳勲家緝獲錢寧家人朱喜與同官校分其贓銀萬計不以奏

聞擅自脫放又賄拏奏訴冤逼其懷狀者自縊只此二事其狡猾欺罔之罪有不容誅而景賢不悟任其愚弄壞事此景賢之罪難逭矣臣愚欲乞陛下大奮乾剛亟將崔文查究其支費帑銀必誅之於市以為首惡之戒芮景賢降

勅切責陶淳下之法司究問明白以正典刑庶權奸  
知警地方以寧

陛下清明之德有光平明之治無損世道幸甚臣職  
當言跼苟有所聞不敢緘默惟

陛下垂聽焉

嘉靖二年六月二十一日奉

聖旨該衙門知道

浙江道監察御史臣林鉞謹

題為除大奸以信號令事臣竊見司禮監太監蕭敬本暴白是非辯誣極乞

恩放歸以延殘喘事內開嘉靖初年三月內該都察院出榜於京城街市張掛將臣姓名入於犯人之列伏乞察誣枉准臣私宅養老以終殘年等因奉聖旨爾歷事累朝供奉

列聖諳練事體才行老成多效賢勞忠勤茂著嗣位之初特加委任宜照舊安心供職以副眷遇至意不允所辭榜文便着收了各衙門不分是非只據論列之詞一槩出榜張掛都着回將話來

欽此 成命播宣傾朝驚愕皆知

陛下誤信邪言遂其奸計夫

陛下初服俯從言官論列首闢異端以正人心

勅頒榜文四方風化丕有關賴不獨指揮使孫洪之

疏驟列蕭敬於逆黨而天下咸知蕭敬即未敗之

劉瑾畢真也 先帝赫然斥廢私第驗之錢寧

廖鵬王淮得實豈獨蕭敬與錢寧張銳張雄等

十數元惡顯有徵証及查都察院問過小吏孟

鎮等文卷內蕭敬在 先帝時因太監劉養得

其金七百兩屢捏寫 先帝旨意故為御史唐

鳳儀叅 奏云協臺憲以行私通姦臣於授判

情何減於劉瑾罪實浮於錢寧又都察院題復  
云明受吏胥之賍故贖朝廷之法情罪既屬  
於獄案姦欺悉洞於宸衷據此則蕭敬為奸  
黨之魁豈謂枉誣之耶往歲

陛下不知而誤用之群臣交疏堅乞斥誅

陛下獨宥之蓋其奸謀之深黨援之衆具見於當時  
孫洪之疏禮部覆奏蕭敬在司禮監已所經  
閱不可謂不知胡不即時

請辯而隱待於後耶賴

陛下明聖獨允其奏奉聖旨是這本內所言都係  
風化重事着都察院查照律例通行出榜申明

禁約今後再勸庵觀寺院私度僧道尼僧女冠等項的都拿問治罪欽此欽遵是蕭敬之是非誣枉節奉聖斷緣係欽依事理臣子豈敢擅妄增減一字耶如部院之臣惴惴權勢泯去其名不惟取戾國憲自知有敬不知有

陛下則大不忠也今蕭敬所暴白申明故在榜文頒掛之後蓋恃

陛下柄用之專且不先陳具疏而輒擅取榜文一道以觀蓋輕

陛下妙年大肆無忌實蓄無

上之心時司禮監無一人正救之者非惧

陛下傾寵之故而不敢言必彼之奸掩其不知而收  
取之偽托辯疏佯裝請老以熒惑 聖聽

陛下憐之至加慰諭眷留着今收榜切責部院四話  
陛下保佑姦回之過不知其緣是敢威天下令天下  
知其勢之能轉移乎

天子與明其尤得 世之專且甚也

陛下特令收榜使天下臣民咸知蕭敬之故遠近囂  
傳必相畏曰蕭某權勢傾軋中外雖在左右親  
信者咸莫之若不然

天子號令力得而反之九卿大臣以之而請罪雖以  
尚書毛澄都御史金獻民係望於時皆憚勢內

顧持位而結舌是

朝野唯知有蕭敬矣夫都察院受寄

天子之耳目遵布號令以軌攝臣民而歸之治易曰  
渙汗大號言如汗出而不可復反書曰令出惟  
行弗惟反以公滅私民其允懷皆號令行則  
朝廷尊令一不信則人莫適從今

陛下狗蕭敬人之私情以廢天下之公論及令敗  
政是

天子大權蕭敬所得以共制臣見挾姦之輩將躍趨  
以爭附萬方之耳目弗定將擾而無自志不軌  
之徒將輕令以玩法網關係誠切重也伏望



陛下大奮乾斷誅罷蕭敬以警懼姦黨仍乞  
勅都察院頒行原榜崇信踈令以伸

朝廷之尊用定萬方臣民之守臣不敢愛生避禍

焦心冒昧陳聞

嘉靖元年四月二十六日奉

聖旨已有旨了該衙門知道

禮科給事中臣章僑謹

題為糾劾事先是東廠太監芮旦賢接受人民趙紀詞狀具奏追勸蒙

陛下過聽不疑輒差校將知府郭九臯一千人犯挈解來京問理已經刑科批帖去後都給事中劉濟會臣等駁言之於是景賢有分理之奏

陛下褒崇獎借侈美溢情雖古寺人彼呂強張承業秦瀚等若無在其右者使誠操持而庶慎也才識而老成也行事而安靜也

朝廷委任臣方為得人賀而安所庸吾喙柰之何其不然耳只以拿官一事言之其罪狀有六

祖宗設立東廠名為緝事衙門京城內外密訪逆謀妖言等項重情原不該受外方民間景賢無上事而接趙紀之狀罪一先年張銳張雄等雖當天地閉塞之時狐鼠縱橫之日其或有詞不當理則送法司景賢招權無上作威作福而甘出銳等下罪二受詞誤矣奏行彼處撫按勘報一吏人事耳何必追提來京天順年間大學士李賢極言錦衣衛官校差出害民

英宗為之歛戢成化中大學士商輅又復言之特坐廠汪直也至弘治以來此風頓復號稱我

明成康正德不足論也今景賢差此輩手握

駕帖兩處舉人未免騷擾地方置

陛下有過之地罪三知府秩二千石視諸侯今之所  
謂方面天子共與安天下者也故治理效璽  
書褒嘉九臯雖庸知府也一日差人數千里外  
檻械之奴隸之殆賈誼所謂不可令衆庶見者  
乎辱朝廷名器失士大夫心罪四會題時臣  
等咸謂景賢以安靜聞不應有此垂繆其必千  
戶陶淳為之今而曰未嘗被其愚美將誰欺歟  
夫陶淳京城三尺童子皆知其惡或呼為陶蝎  
豈景賢獨不知之邪政主文於內陶淳行事於  
外彼此相扇搜洗作奸正恐景賢由之而不覺

也夫不知而用之謂之不知知而縱之謂之不  
仁不智不仁其究不忠罪五近言者止於陶渚  
罪狀不聞有景賢考之於理罪人不在臨洮永  
平而在肅牆之內乃欲以身庇之畜其猛狗之  
力覆車在前明鑒不遠失今不治後患益深罪  
六夫此六者 祖宗有神靈 朝廷有法度天  
下士人有公論景賢其何說之辭老成蕪靜不  
如是也向拿主事陳嘉言則以太監溫祥為之  
訟者有說也迺今輕信一民人而便拿一府  
白此開告密之門長刁惡之風興羅織之蒙  
衣冠之辱解志士之體變

成法之良蠹嘉靖之治蹈正德之亂是誤

陛下者昔有崔文今又有芮景賢矣可勝誅哉為景賢計聞言引咎亟請停差將人詞連送法司以謝天下天下之人皆將聞景賢之賢也如此而能不忤改過俾補新政如此則臣等亦與有休焉默可也而其執迷自是不能舍釋終為亂法之臣乞將芮景賢罷斥將陶淳邢政拏送法司將郭九臯等一千人犯改付相應衙門問理速罷差遣天下幸甚臣不勝一念憤激知言出禍隨惟

陛下察其愚忱無使箝天下之口

嘉靖二年七月初七日奉

聖旨趙紀事情待一千人犯拏解來京之日問理明白朝廷自有處置這給事中如何這等來說顯是輕率妄言本當查究且饒這遭罰俸三個月該衙門知道

兵科給事中臣趙漢謹

題為杜群奸以保治安事近見南京

孝陵司香內使谷大用奏乞來京閑住及請

康陵司香自叙不惴致有憫念微勞殘喘等語臣觸目激中不勝駭異此奸尚蓄此意耶臣未暇審其平生以汗簡劄即其大者盡惑

先帝濁亂 朝廷大下之稔惡也而顧以有勞自居  
逃避斧鉞保全首領 朝廷之誤恩也而復以  
殘喘自計出死而過求喙窮思噬蓋未但已也  
舍罪而言勞積怨慙負蓋未少忘也故假乞衰之  
詞行姑試之術積由來之漸冀再竊之威言似



淺而謀實深迹若孤而力有恃臣不知谷大用  
以何時視 今日謂 聖明為何如而復萌此  
意也臣無知識嘗過慮君子小人進退之機正  
今日之大防也觀於谷大用之奏蓋信然矣不敢  
不為

陛下言之臣惟罷閑官吏干預政事律載明條嘉靖  
以來屢有禁革近聞京城潛住此輩其所干預  
者殆非細故也

陛下知之否乎 新政之初大臣不為清議所容者  
被斥而去近聞此輩時令家屬挾貨求京營求  
起用無所不至其於清議誠不少顧矣

陛下知之否乎夫吉凶之理貞勝不常君子小人迭  
為消長而世之治亂因之方今天下有治之名  
無治之實其於君子小人用舍之際所當深思  
而切慮者也乃為罷閑遣斥之輩失志無聊之  
徒投間抵隙窺竒寵用黨政傷和黨邪排正  
苟有識者謂有此則治耶亂耶不極於亂不已  
也然若等有狐狸魑魅昏暮竊發蹤跡未著猶  
有待焉者也而谷大用則在押之虎使縱而逸  
之能不於通衢白日挾諸邪而肆其毒乎臣是  
以斷謂谷大用之奏於君子小人進退之幾大  
可慮也臣請

陛下早為之所深察治亂之由益嚴邪正之辨書曰  
其難其慎惟和惟一必於君子也可否拒濟勿  
以逆耳之故傷其和終始惟一勿以偏聽之疑  
衰其敬則君子安矣其防小人也慎其聽察難  
其用任則彼固無釁而乘無階而緣矣然小人  
之尤如臣今所論者又不但克艱克慎於用舍  
之間而已也若不明罰勅法正其罪屏其跡臣  
慮萬難圖卒若之何哉如蒙乞

勅法司查照谷大用原發罪惡正其典刑否亦投諸  
四裔以痛絕之再行巡城御史緝事衙門察訪  
京城內外如有潛住罷閑官吏非分干預并去

位大臣通交權勢等弊從實奏  
請處治庶乎法度脩而綱紀振奸邪去而治理得矣  
天下幸甚

嘉靖三年五月二十六日奉

聖旨該衙門知道

陛下不惟不禁而又使人不得禁雖曰縱一人而實  
乃以導衆人在真雖得私恩小惠其如設湖澤  
之陷窅何況鎮守之置以鎮靜地方用防意外  
撫按之司所以除奸革弊鋤梗別強

祖宗良法美意凡以為民也今勢應鎮靜者假借以  
爪牙理宜振作者消阻其風采倒行逆施不可  
明甚

陛下何所見而復為之哉訪得太監潘真蓄智藏機  
設柔奸而飾惡佞詞下士假偽貌以濟私夤緣  
恣法外之求破例竊維新之政即其廣置心  
腹已可燭見肺腑如蒙乞將潘真取回量加懲

戒別選奉公守法之人徃代其人惟復降  
敕切責使勉圖自新以贖前罪仍乞收回前項  
成命以後遇有各省積年無藉投充鎮守分守衙門  
書算人等生事害人者撫按官訪拏重治庶效  
尤者得以杜其漸而灾傷憔悴之民僅得安生  
矣臣等待罪該科謹遵

明詔伏乞

俯賜施行臣等不勝幸甚

嘉靖三年十一月初八日奉

聖旨已有旨了

戶科右給事中臣孟奇謹

題為消沮姦黨以重

朝廷事訪得太監李宣在

先朝時出入逆瑾門下差徃江西看事得貨數萬回  
見逆瑾而有重寶八千之餽駭人心目此時宣  
府馬氏女得幸就以私第見之遂謀京倉提督  
大肆貪饕人不堪命嘉靖初奉

詔裁革人心大悅近者又更諂諛

皇親結為姻好當緣左右復有提督京倉者

命上累新

詔畫一之法下啓奔競女謁之端宣之罪惡不容於

誅矣抑宜之為此豈無所效尤邪蓋

先朝姦黨如太監魏彬者其弟魏英不惟以女而婚  
江彬之子且又以一女而配

皇親長寧伯以一女而妻襄城伯張明者張太監銳  
之兄也其女而與豐潤伯之子錢寧者錢太監  
之家人也其女而與王駙馬之孫彼廖鵬又何  
人哉以大寧侯而為之婿夫非我族類往哲格  
言薰猶不雜聞之前典彼數大家或其先姻連  
帝室或其先勲紀太常世業可守前徽未遠乃姻  
淪雜罔計所養納采於管庫之人同穴於輿  
之鬼惟利是求曾無覲顏志士聞而傷心舊



為之歎息蓋高門降衡實自己作而蔑先辱親  
於是為其自

皇上中興以來克遵 典憲除舊布新而

先朝姦黨內臣弟姪家人猶潛居都城布列

禁地鑽刺伺窺無所不至襲前日之故智圖後日  
之牽復若其謀遂成則其禍匪細此風不剪弊  
源益開點世塵家將遍勲戚伏望

皇上負宸輿懷思清汚俗將李宜取回閑住將一切  
姦黨名下管家及弟姪家人盡行逐外則肘腋  
之下豁然清謐若夫勲戚之家敢有似前貪利  
結姻者即係姦黨許科道官直言糾舉及緝事

衙門訪察拏送究治離異仍通行出榜禁約如此庶使已汙之族知所愧懼而方媾之黨革心於將來矣

嘉靖二年八月三十日奉

聖旨李宣已有旨了一切奸黨名下管家及弟姪家人先年蠱惑誘引亂政壞事都不曾明正其罪管家的還着司禮監查發南京各監局當差弟姪家人不許擅入禁門今後勲戚之家都不許貪圖財利與結婚姻有違犯的從重治罪該衙門知道

兵科給事中臣張原謹

題為

請逐儉人以端治理事頃者巡按江西監察御史程  
啟克封進宸濠與太監蕭敬交通私書因具疏  
以發其奸奉

聖旨該衙門知道欽此繼而兩京科道等官交章論  
劾節奉

聖旨已有旨了欽此臣側聞綸綍無任驚惶晝夜  
思惟莫得其說夫罪之至大莫過於謀逆情之  
至可惡莫過於逆黨故春秋示無將之戒漢法  
垂不道之誅我

大祖立法擬以十惡之律而著於常赦不原之條蓋  
皆為此

陛下豈以敬之交通宸濠謂為小過而可輕宥之邪  
宸濠本以宗室至親尚且削其譜籍置之典刑  
敬何人也獨可逭其罪邪

陛下昔在藩邸隔越數千里之遠知其奸多未之詳  
猶可諉也今自即位以來凡江西逆黨之所招  
承宸濠簿籍之所記注與夫兩京科道等官指  
其實而數其罪者不下二三十疏則

陛下知之亦已明矣乃復排群議任已私不肯罪之  
不罪之猶可也顧又置之左右委以機務抑且

屢賜 溫旨勉留之臣不知其何為也且敬受  
累朝厚 恩不思所以圖報乃敢植私黨而潛為異  
謀則其得罪天下得罪 宗廟得罪

社稷大矣

陛下獨不能無疑於敬而有所不安乎雖敬亦自知  
為天下為 宗廟為

社稷之所不容而凡朝夕侍奉

左右之際將亦有疑於心而不自安也上下相疑恐  
非 陛下之利敬平日收恩於名下私覆其黨  
與凡 皇城各監局及各宮分置皆有其人况  
其掌家太監如劉恭門下家人如王諒者素號

狡猾最善黃緣布在內外為之應援而

陛下左右多所交通設或

陛下時一不察誤聽浸潤之言使彼得施其默助之  
奸則敬又將得地矣先日以罪放逐之人皆倚  
敬之去留以為起復臣竊為

陛下危之書曰去邪無疑今

陛下知敬之邪而曲護之延以歲時竟猶豫而不肯  
去之不去敬則愛全矣

陛下縱全私愛柰天下人心何柰

宗廟社稷大計何

陛下若以敬為知事而司監執筆不可無敬今敬之

年八十五亦已老矣就使其精神尚健能復  
幾時他日若敬已死

陛下亦將復用人乎抑亦以必欲留敬不死而用之  
乎敬以柔媚而啗人以陰險而賊物歷年已久  
更事頗多精慮設謀最深且熟真所謂老奸巨  
猾也自成化年來累被言官論劾畧不畏懼退  
避每語人曰我受

國厚恩不忍遽去俟

大婚後即當懇辭耳今大婚之禮既成止見其一嘗  
具疏請陳旋即復爾自臣觀其意祇欲以壓服  
人言也厚顏據位貪昧隱忍無一毫愧耻畏避

之心敬尚得謂之人哉伏望

陛下大奮乾剛洞垂離照俯念敬之事已敗矣罪已大矣順天下心為宗社計速發

詔旨將敬放黜則

陛下保全敬之恩實大耳至况敬囊橐積貲甚多計其餘年用之不盡使敬優游安享老死謫下亦當感

陛下於無窮也臣又按劉恭先因納賄招權被人論列彼乃稔惡不知悛改王諒及其子仁以市井匹夫投托敬之門下席其權勢冒罔受官此皆廢置打點為敬腹心肆為貪饕極其富貴敬



賴此輩以為保司地位之計而不恤壞

陛下之事此輩賴敬

而苟圖富貴之資而不恤壞

敬之事敬之所以不肯去不能去者以有此輩

為之謀主臣以為此輩之罪不可赦也更望

陛下敕下法司將恭等明正其罪遠示竄斥仍

勅內府內臣以後敢有代敬請托夤緣者一體罪之

庶有以剪其羽翼除其本根而奸計不得潛滋

將長於投間抵隙之時姦黨無復翹首跂足於

依草附木之望矣臣與敬等本無睚眦第見其

壞

陛下之事亂

陛下之治者甚多是以昧死為  
陛下備陳其愚臣無任戰慄待  
命之至

嘉靖元年十月十八日奉

聖旨該衙門知道

禮科給事中臣董儔謹

題為申嚴禁令以杜姦謀以保治安事通者南京  
孝陵神宮監司香火使谷大用奏為懇乞

天恩司香圖報以便調理一節

陛下付之該部知道是蓋不與其進也仰惟

聖明銳意中興決不為此輩所惑而臣竊有過慮者  
則為谷大用等罪大惡極無所逃於天地之間  
幸未即誅方喘息不寧猶恐不保首領以沒而  
何敢於自鳴哉其為此謀蓋以嘗試

陛下也不於此時早辨而痛絕之死灰復燃之心羸  
豕躑躅之勢豈一大用而已此臣之所謂過慮

也痛惟先帝初政清明可繼列聖之美未  
幾為大用等所誤內連瑾賊外引寧彬樹八黨  
之兇釀十年之禍而污我明百五十年之治  
遂使先帝不得正其終論者言之備矣

陛下知之悉矣是故節奉欽依列其罪狀則曰他  
每隨侍先朝朋奸黨惡百計蠱惑離間

宮闈竊弄威柄變亂成法放逐大臣陷死忠諫導  
引巡遊招權納賄盜竊名器冒濫爵賞古今  
大惡神人共怒本都當重治姑從寬處今大用  
丘聚降俸南京孝陵司香欽此乃正德十六  
年四月之明旨也禁其貪黷緣則曰谷大用魏

彬張永等首先黨比蠱惑專權亂政張銳張忠  
張雄于繼蘇縉孫和劉養等相繼進用彼此效  
尤朋奸壞事幾危社稷貽累先帝俱罪惡  
深重朕在藩邸知之甚悉新政之初始從寬發  
遣黜革豈容夤緣再亂天下今後但有與他每  
通請謁的即係朋黨一體從重治罪欽此嘉靖  
元年十月之明旨也夫天語戒嚴雷霆凜  
於鈇鉞由前旨則大用等死有餘辜由後  
旨則大用等生無還理不知一旦何所窺矚何所依  
賴故違詔旨而敢於陳乞如此敘  
奉迎之勞懷康陵之便假生還之語投干進之

機既誤 先帝復欲誤

陛下既誤 先帝於在御復欲誤 先帝於

康陵其為設謀積慮可知也罪不容誅矣臣謂不早  
辨而痛遏之而姑從應之恐乘間伺隙每飯不  
忘一邪先登群兇競起擅久債之毒而甘心於  
熟路不但一大用不但如往時而已也

先帝既誤

陛下豈容再誤耶且今在左右諸臣號為老成練達  
者有之所望中外夾持共塞蹊徑將小人似無  
容足之地萬一慮不及此而輕啓其實致被譴  
亂天下將來玉石不分矣臣之所過慮尤

之所當慮者也關係匪輕宜早禁絕不惟是也  
臣又風聞有等先年壞事罷閑文武官吏人等  
或以考劾或以裁革自宜畏罪遠去老死牖下  
未為不幸顧乃潛住京師交通往來夜聚曉散  
鬼秘神奸或亂衣冠以混衆或假名姓以欺人  
或挾貨以營求或流言以飛謗變黑以為白倒  
上以為下權門乞哀怨家致仇恣肆浸淫漸不  
可長凡此皆先朝之罪人新政之所宜誅  
而不赦者也即其奸謀去谷大用等無幾矣如  
臣愚慮亦合通行禁約伏望

陛下大奮乾剛申嚴禁令先將谷大用遠徙以示決

不復用之意然後

勅司禮監及南京守備衙門務要嚴加鈐束其有賞  
緣如大用等前項罷閑官吏人等更圖復用蠹  
害新政者宜着緝事衙門通行訪拿斥逐務  
在盡絕不得容隱回護知而不舉者許臣等科  
道指實劾奏以故縱論仍望

陛下以謹微之思圖精勵之治庶上下一德法度整  
嚴久安長治之策端在此矣臣待罪言官今日  
不言將有不勝其言者以故冒昧不敢謂杞人  
之私也伏惟 聖明裁擇 嘉靖三年五月下  
七日奉 聖旨該衙門知道



都察院左都御史臣王廷等謹

題為內臣糾衆闕下毆打朝臣乞賜

乾斷以全國體并自劾退以振紀綱事本月初九

日辰時臣等候

陛下退朝散出掖門偶見內官集有數百餘人填

塞掖門外臣等以為朝廷頒賞伺候因即

前行聽聞喧攘回見衆內臣擁採監察御史李

學道按拉在地剥去冠帶口斗打死拳毆脚踢

拔髮棍打頭破血出兇橫莫救一時大小臣工

相顧駭愕以為自古所未有之變蓋帝王所以

治天下者在法度臣民所最敬畏者在

朝廷今

掖門之外皆

朝堂也乃糾衆多人毆

打朝臣猶謂有法度乎猶謂有朝廷乎及詢

被打之故蓋因御史李學道巡視中城兵馬司

地方於六月二十七日總甲具呈并徐氏投告

有已故夫陳用先日逐去義男許義私自淨身

投入皇城今來家持刀赫財等因到官已經

本官叅奏夫許義既入皇城即不當出外

既已具奏即應候朝廷處分今乃不候處

分糾衆毆打御史于闕廷之下臣等切惟御

史為朝廷耳目之官掖門係朝廷嚴禁

之地敢有稱亂是視朝廷為無法度矣其視

陛下為何如雖先朝奸宦橫恣亦所未見不意乃見於今日此事傳于遠近人將謂何四夷朝貢何所覩瞻臣等甚為

陛下惜也今所歐人衆臣等不知其誰何然掖門內臣必知之錦衣旗校必知之內官監必知之蓋許義既選入皇城必有執事係何太監名下以此推求則今日糾衆歐打皆此太監之所為也身為太監為朝廷禁近之臣敢於蔑視法度蔑視朝廷猶使近在左右殆恐不可況漸不可長奸不可縱臣等不能不為之隱憂也伏望

陛下興念及此大彰 乾斷亟行究治以振綱紀以保治安再照臣等待罪紀綱重地才識闇劣先事不能寢朋奸之謀臨事不能為解焚之策目激此變實切慙悚乞將臣等速行罷黜以為不職之戒臣等不勝懇切待罪之至

隆慶二年七月十一日奉

聖旨這行兇的着司禮監并緝事衙門照前旨上緊訪拿同許義送法司究問紀綱法度朝廷自有主張卿等各宜安心供職

雲南道試監察御史臣詹仰庇謹

題為懇乞

嚴究恣肆內臣以戒逸欲以端近習

事臣惟損德害身之大莫過於逸欲而逸欲之漸每起於近習蓋人君深居九重延接正人之時少親近便嬖之時多侈靡習成逸欲易生至於墮德害身則莫之知也是可不為之戒哉臣聞本月初五日夜內官監研製火藥發火延燒房屋十餘間道路傳言謂製辦煙火進上臣聞之不勝驚駭夫

陛下躬行節儉四方仰頌阻抑寵倖中官斂迹臣固有以知

陞下不肯為此也兩廣不寧邊關報警言災異叠見

餘哀未忘臣又有以知

陞下不樂為此也盖由此輩細人諂諛側媚諛巧奸邪思無以悅

陞下之心志將欲緣此以為取寵之階慮無以娛陞下之耳目將欲藉此以為求媚之漸而於

君德有損君身有害彼何知焉况

宮禁之地法當嚴防柰何以研火藥而焚燒房屋設若蔓延難遏將若之何縱肆無忌至於此極若不嚴行究治則小人得肆其奸而侈靡之事甘抵隙而進至人伏望

陛下大奮乾剛敦尚儉德深惡逸欲之漸以端近習  
之風乞 將內官監失事人員盡行查究而一  
切煙火燈棚悉旨禁止則於

聖德不為無補 聖身不為無益也且今正春伊始  
萬象更新茲一舉動天下所由傾耳拭目者矣  
若以上元之樂為微事烟火之舉為細故不足  
以為 聖明之累者是欺

陛下而誤

國家也再照每年正月十一日起至十五日止

京師東角頭張設燈市繁華異常每燈一架值金  
數百中官富家賄財稅買而遊觀喧嚷男女混

雜淫侈之俗莫此為甚臣請

京師者四方之表率也

陛下既以節儉為天下先而京師顧奢靡若此則  
四方相尚民用俗偷有由然矣仍乞

勅下嚴衛禁革使天下知敦本崇實以成朴儉之風  
未必非國家之福也天下幸甚臣民幸甚臣  
不勝戰慄恐懼之至

隆慶三年正月初十日奉

聖旨失火人犯已有旨了該衙門知道



巡按直隸監察御史臣林潤謹

題為再裂忠肝述民情申逆罪乞正典刑以彰  
天討事臣聞君親無將春秋誅意故亂臣賊子天下  
之所共誅幽明之所同憤也臣近因嚴世蕃羅  
龍文罪惡顯著敬陳其槩上瀆宸聞仰荷  
聖明洞察專委拏送臣感激就道馳赴九江凡所經  
過府縣及江西境內之民聞風聚觀歡呼鼓舞  
若出於湯火之中而躋於春臺之下又莫不舉  
手加額祝曰

聖天子為民除害造福誠願

萬壽無疆臣備詢其事始得逆狀之詳竊思世蕃之

首惡雖拏而餘黨猶未解禍根猶未絕人情洶  
洶尚慮其後此臣所以切齒痛心不避鉄鉞而  
再賣天威伏惟

陛下少垂察焉切照逆犯嚴世蕃罪惡滔天積非一日  
而近時不法之事又非一端任彭孔為主謀任羅  
龍文為羽翼任惡男嚴鵠等家人嚴珍二等為  
爪牙窮兇極欲無所不至在省城已占食基而  
又併吞宗室之府第在袁州已占官地而又  
侵奪平民之居房改祝聖之寺以為家祠鑿  
穿城之池以象西海其直欄橫檻峻宇雕墻巍然  
廟堂之規模也袁城之中列為五府南府居鵠西府

居鴻東府居紹慶中府居紹康而嚴嵩與嚴世蕃則居相府廊房迤邐萬間店舍環亘數里招四方之亡命為護衛之壯丁森然分封之儀度也總天下之貨寶盡入其家傾天下之庫藏莫比其蓄世蕃已喻天府諸子各冠東南其豪奴之嚴年謀客之彭孔倚勢而作威福家資亦稱億萬閭閻膏脂剝削殆盡民窮盜起職此之由從古以來未有以凝其貪而彼方揚誇於衆曰朝廷有我富丁粉黛之女列屋群居所衣皆龍鳳之絹所飾盡珍珠之寶張象牙之床圍金絲之帳朝歌而夜飲絃左斟而右舞宣淫無

度汙巖網常從古以來未有以擬其奢而被又  
揚揚誇於衆曰朝廷有我樂乎養家丁已踰  
二千納亡叛更倍其數以造屋為名而聚四千  
之衆以防盜為名而首旂數千之兵精悍皆在其  
中妖術竝收於內旦則發鼓而聚暮則鳴金而  
解故有嚴珍一則窩共獄強盜而白晝行兇如郭  
宜三劉相誼洪斗文樞李錦段田鍾福秀等百十  
餘人明稱嚴府官舍山後於湖廣江西之界打  
劫無忌近有萍鄉縣張恭八之家則被其殺死  
男口淫汚婦女有瑞州過客况巧兒則被其殺  
死性命劫奪財物此則袁州府已擒獲三十餘

名招申兵備道可証也有嚴壽二則陰養刺客  
而昏夜殺人壽二與胡龍之妻何香兒稔姦遂  
令勇士刺其夫而拐其妻此在分宜縣訪獲成  
招監候可証也或奪人子女而致其孤寡者則  
有嚴銀一占周龍一之妻嚴銀二占易通秀之  
妻嚴恩一占易江一之妻嚴來童占鄔銀六之  
婦或受人投獻而毆傷人命者則有嚴和鳴之  
傷鄒均重嚴鳴鳳之傷黃質鍊嚴樊之傷任良  
諫嚴瑞朋之傷鄒公顯或奪人田地而負累陪  
糧者則有嚴富之騙陳寶也有嚴景八之騙孔  
源也有嚴臻福之騙彭栢也有嚴進壽之騙鍾

發聲也有嚴琴之騙楊宗儀也有嚴珍之騙郭  
寓也有嚴七之騙鄧承勣也有嚴積之騙彭槐  
也或奪人房基而指價不與者則有被嚴保之  
害者李元三也被嚴恩之害者崔元二也被嚴  
勤之害者王鎧也被嚴珍之害者黃棗也被嚴  
漢二之害者袁堯明也被嚴興四之害者傅運  
也被嚴亥之害者林紹新也被嚴仲一之害者  
彭述古也被嚴富二之害者蕭珠也被嚴銀之  
害者張文耀也被嚴志之害者朱寶王金也被  
嚴珍二之害者楊允積陳子良也凡此皆黨之  
黨今彭孔之主謀敗露者已如斯而陰秘者又

不知其何限也臣切思宸濠逆謀之初亦不過  
結納賊首誘致姦人受獻田產而已今世蕃之  
不法揆之於逆濠無異故今日民苦于蕃殆甚  
於當日之苦於濠耳且注廣閩楚山谷之賊垂  
涎彼家積貲蓄威觀釁蓋未嘗一日忘也是在  
江西隱憂不在世蕃則在山賊矣况世蕃包藏  
禍心已著於在朝之日臣又請舉而實之伊  
潘典揆妄懷思念籍沒其府則有咀咒之詞又  
有九五當乾之牌見貯河南布政司是揆不軌  
之迹甚昭彰矣然其陰結於內者實世蕃也世  
蕃受典揆賂金十餘萬而主其謀故典揆敢逞

其狂背之志及聞世蕃問遣而典換之望已孤  
遂差樂工三十餘人至其家倒贐回至吉安地  
方俱為世蕃計殺此中外大小臣工之所共明  
也故臣前論伊蕃之疏有曰託交竄逆之門數  
萬通神陰扶默助蓋已指世蕃而言矣是世蕃  
之陰結典換又何異於錢寧滅賢輩之交通宸  
濠乎幸賴 聖明英斷早發典換之姦先逐世  
蕃於外以消隱憂邪於未萌不然則內外夾謀  
雖萬不能為 宗社之憂而中州之民恐亦無  
噍類矣然則世蕃在 朝之日蔣沐

厚恩有懷異念况今怨望於罪迹之時乎况今不法



之迹又昭昭如是乎是世蕃居 朝則為寧賢  
居鄉則為逆濠以一人之身而總群姦之惡至  
於財壞士風流毒善類紊亂紀綱斷傷元氣則  
又群姦之所無者臣謂雖赤其族猶有餘辜豈  
特止於一身而已哉臣又反覆思之嚴嵩又惡  
得無罪孔子謂事君之道止曰勿欺嵩獨不聞  
是訓乎夫嵩位極人臣寵絕百僚以義則不可  
欺以 恩則何忍欺而嵩顧公然欺之何耶自  
世蕃問發雷州並未赴伍僅居南雄二月而返  
南雄去雷州三千餘里而抵袁州則數程耳嵩  
於往歲乃敢朦朧奏 請量移附近衛所夫近

已近於家不知又更移何處未赴伍而求改移  
既在家而復請乞斯疏一上物情俱駭嵩獨不  
顧恣意行私茲非嵩之欺

陛下乎既而復蒙

聖旨云嵩有孫鴻看待此恩已特是

陛下辭婉而意嚴真明見萬里亘古莫及矣嵩又恬  
不為怪仍復容留在家以明旨為不足恤以  
國法為不足遵惟知有私恩而不知有公義茲非  
嵩之欺

陛下乎近奉 旨拿問有伊孫冒功監任錦衣衛指  
揮嚴紹庭在仁京隨差家人走報只二十餘日即

抵袁州嵩一聞報又遣世蕃潛遁乃躬謁兵備  
有司囑之曰小兒在家即不能隱今回文只云  
老夫有不起之病令其回家既次日度世蕃之  
去稍遠又遣其婿素應樞囑之曰但回云向在  
該衛並未回家各官乃應之曰無病而謂有病  
已不敢誣棄伍而曰在伍孰能當罪是衆睹昭  
然尚猶粧飾無忌茲又非嵩之欺

陛下乎向日在 朝嵩猶諉曰以一身供奉

皇上家中之事難以盡知今在家矣世蕃朝夕與俱  
矣訴冤哀泣者聲徹穹蒼嵩亦曾聽聞矣有司  
受詞數千為之問理者十之一二其餘盡送與

嵩嵩亦檢閱其詞而處分矣然則世蕃之惡嵩猶諉於不知臣未之信也夫既知之而又縱之不特縱之而又曲庇之此臣之所以反覆思之謂嵩誠不能無罪也故敢披瀝血誠以極忠悃而併鳴於君父之前伏乞聖明詳察

勅下三法司會同多官將臣所奏事件逐一查究如

果臣言歷歷可據願將羅龍文嚴世蕃處以極刑碎肉梟首圖示天下以洩神人之憤嚴懲廷併提查革仍乞遣忠直剛正肅清德望大臣一員領勅前去會同江西撫按嚴密緝將彭孔明正典刑以謝萬姓之怨

招納亡叛之輩尚有數千餘人則設法解散毋貽地方之患其家財不啻千董則藉沒輸邊且以杜姦賊窺伺之心逃軍嚴維等與家人嚴珍一等則提問如律其地基田基應還官者還官應給主者給主原占妻女曾否給配原負稅糧曾否豁分今袁州一府四縣之田七在嚴而三在民在嚴者皆膏腴在民者采瘠薄在嚴則槩戶優免在民則獨累不勝臣聞百姓困苦難支逃散流離者接踵併乞行議處如近日言官所請限田之制限制之外悉與百姓均差以蘇困疲仍出給告示聽民赴理一一俱為處分毋畏

強禦要在安民茲豈特地方一時之幸實

宗社無疆之慶也其致仕大學士嚴嵩伏乞

聖明裁斷少加切責以爲人臣欺君之戒臣僻遠孤  
寒感激知遇糜軀圖報乃其素心銜直沽名委  
所深恥此犬馬之微衷實神明之共監謹此干  
冒

天威臣無任忠憤激切恐懼待罪之至

嘉靖四十三年

聖旨

巡按直隸監察御史臣林潤謹

題為逃軍怨望

朝廷黨衆肆害漸成大亂懇乞

天威速賜處治以昭

國法以絕禍根事臣濫役巡

視上江備訪江洋夥賊強劫皆土豪巨室以為

之窩主有軍犯羅龍文逃回原籍歛縣藏亡匿

死迹涉可疑臣隨密行徽州府推官栗祁緝捕

據本府揭稱文龍近潛往嚴世蕃之家不知何

故臣又訪得到家隨差兵番同該縣協拿詎意

龍文擁衆自衛竟致脫逃聞又投入世番家矣

夫世蕃龍文二犯悖逆兇醜罪惡滔天仰荷

聖明洞察逮獄考訊一時人心奮躍孰不曰使世蕃

龍文粉身碎骨庶可以洩神人之憤伏蒙

聖恩寬宥以不死姑從未減充軍為二犯者宜感  
激再生沒身圖報可也乃弗自省愆反懷怨望  
義視國法竟不赴伍而安享富貴僭擬王公  
此無忌憚何如哉如龍文之居則據山為險去  
縣五十餘里謁祖則鼓舞盛張冠裳炫耀居常  
則擅着蟒衣妓女環列且扣集惡少出入靡常  
今之江洋行劫雖未必盡出其門要皆多彼之  
黨矣世蕃之暴橫無異於在朝之時或肆為  
訛毀或縱為淫樂或奪人財產負國背

恩亂風敗俗莫此為甚聞鄉間含冤每赴類於官司



者動以百計近以造屋為名聚眾至四千餘人  
竒謀詭秘人心動搖百姓挈父老妻孥而逃有  
司以城池倉庫為惧不有推官郭諫臣申文上  
司解散而地方之變成矣夫此二犯橫惡素著  
於平時狂兇更彰於謫後以世蕃之逆而濟以  
龍文之險以小人之無忌憚而更懷怨望之心  
况其交結往來神出鬼沒而莫知其狀招集黨  
與夜聚曉散而莫測其蹤此其意欲何為哉夫  
今不誅後患難圖亂機所伏關係匪輕故敢披  
瀝以聞伏乞勅下法司詳訪如果臣言不  
虛乞將嚴世蕃羅文龍差校提解或行各原

籍撫按嚴拿竊恐臣已發覺二犯必聞風暫赴  
該衛仍乞行各着伍所撫按嚴提解

京究問明正典刑庶法度昭而姦究知惧禍根絕  
而朝野寧謐矣

嘉靖四十二年

聖旨這逆犯着林潤拏送來京問

南京山東道監察御史臣林潤謹

題為乞黜巨蠹以消民怨以快士論事臣仰惟我  
皇上敬

入勤民任賢圖治通者偶因早暵經時風霾示異又  
俯從言官之請

特命兩京部院老察諸司百官四品以上京堂著其  
自陳又聽科道衙門拾遺叅劾甄別賢否去留  
至明至當故凡在位諸臣莫不洗心改行勉圖  
職業以共成太平之治蓋彬彬然盛矣然內外  
喧騰咸謂風憲大臣之中有罪惡昭著極為公  
論所不容者尚得倖脫是猶未免為

清時之一塵穢也臣待罪南臺博採群議不忍隱默  
敢舉其人併條具蹟跡為我

皇上陳之謹按都察院左副都御史鄔懋卿奉  
命總理淮浙等處鹽法蓋因

內帑空虛邊儲匱乏我

皇上特勅其經理財用以濟時艱亦出於不得已之  
計也為懋卿者仰體

聖心潔已奉公調停區畫使上不失

國課下不失民情斯為大臣謀

國之忠也顧乃目蔑

憲典罔法行私所迥屬部掎覈無遺府則定以

州則五百縣則二百三百各有通等其鹽運司則無筭焉兩淮尤為鹽商輳集之所懋卿明對運司欲取銀十萬兩應用運司遂令商人黃球黃煥王鎧等照引科派共計四萬兩送進其管收則經紀周仁等其技遞手本則知事龔楚瑞其押送出境則楚瑞同商人黃球等也以兩淮一運司推之則兩浙長蘆等處可知矣夫懋卿查理鹽課不知有增於

內帑幾何而搜入於私囊者如是此黷貨無厭背公營私其為罪一也又平民李守謙告親人王鏊等侵匿寄頓財物懋卿將鏊等親提面審定

罪發府鍬等懼罪具送禮銀三千兩被守謙妻父千戶社詩在於本院門首隕執又商人吳章被人首告頂堆事情吳章懼罪送銀八百兩主簿吳道東門子徐熙通進其送銀之時吳章令家人持銀被聽事官搜獲併原通進發出照收手本衆目共見道踞傳醜夫濫御職司風紀正當嚴加律紀以振肅百僚而乃暴露職忒如是大喪名檢玷辱風憲其為罪一也每進三寶有金為常及至揚州明知巡撫景節公入巡其則以為奇貨而挾之乃對府官作冷語曰吾將叅之使景韶聞風曲意阿承設酒一席幾費千金

金銀器皿極其奇巧金花飾以寶珠而下貯以銀瓶餽贐之禮聞亦萬餘然後始得其惟顏又往鳳陽謁

陽敢帶戲子王權王灼等仍分付江都縣帶領茶厨郝信張元等及承應人等共百餘人各給路資工食皆出自里役靡費無紀此奢侈縱肆反道悖理其為罪三也且陵轢有司欺虐百姓在揚州駐劄纔三月耳而平民斃於杖下者二十餘人如場官姚佩送冊稽遲厨役蔡京置酒欠整皆小事也俱杖三十而身故聞沿途打傷人亦不計其數小民吁嗟無所控告此殘忍酷毒不

恤怨言其為罪四也北直山東連歲荒歉餓殍盈野死亡枕籍至厯我

皇上宵旰之憂多方振濟憊卿躬履其地目擊其形畧不知動念仍責取於有司有司勢必取之於民是浚垂斃之民膏血以自封也我

皇上愛養元元而憊卿固欲戕之果何如其為心也  
揚州

重地自有倭患以來兵費浩重益以去歲之水災重以撫臣之剝削富者蕩產貧者流竄商亦相挈而逃憊卿查覈過嚴人已不堪加之無名之派去歲鹽徒幾欲相聚為亂



邦本斲喪元氣禍雖隱而貽害實深其為罪五也夫懋卿之罪

朝野共知遠近側目此言官會議論列皆私恨竊嘆遲疑發言謂懋卿廣以結交巧為彌縫非惟言之無益抑且惟其中傷臣一介孤寒愚蠢寡慮獨念忝居言職既知而不言是自負脂韋之罪不忠之甚也豈人臣事

君父之道哉昔季孫行父有言曰見有禮於君者愛之若孝子之養父母也見無禮於君者誅之若鷹鷂之逐鳥爵也翹翼雖傷不避也臣犬馬區區實如此伏乞

皇上察臣微衷衷伏乞

勅下部院再加體訪如果臣言不謬將鄔懋卿速  
賜罷黜庶民怨消而士論快如臣有一言涉虛臣甘  
受顯罰以為言官妄言之戒臣無任激切忠憤  
之至

嘉靖四十三年

主旨

兵科右給事中臣李伯辰謹

題為庸穢具臣不堪重臺重任懇乞

聖明亟

賜罷斥別選才賢以安邊徼以重名器事頃者

治鄖陽都御史員缺該吏部會推而以通政使

趙文華充任一時傳聞舉

朝臣工莫不相顧駭愕驚訝不已胥謂文華何以

堪此抑何遽任此耶夫鄖陽重鎮界轄夷方方

今苗患未盡正疆圉有事之秋而劣犢僨猿非

庸才得據之地臣竊謂其有不可者敢併舉其

平生而悉陳於

君父之前謹按文華本以狎邪小人市井無賴其素  
行久不齒於士論結以獵涉浮詞濫叨甲第初  
受部屬即放肆不檢乃以考察謫調外任及佐  
州善狀無聞貪聲愈著鑽刺當緣營遷京職未  
及數年荐至通顯猶謂其所居非切要之地  
尚可置而弗論也今循資遂得濫推撫治則  
繼此而二以六卿繼此而長於六部亦將循  
資而槩可濫及矣固不徒為今日無治惜將  
為他日之名器重也夫古今小人不假之以  
權未可能濟其惡自何也勢不得行耳苟虎而  
翼焉則將益烈則民何罪哉

任付之匪人抑將何以彈壓羣民示威夷服以紆

朝廷南顧之慮耶臣固知撫治斷非文華之所能  
堪而名器之壞尤不能不為之深惜也叅照通  
政使趙文華邪媚鄙夫污庸末品筮仕不謹即  
考察而謫官鑕刺通神遂夤緣而復進部屬甫  
遷通叅尋改即其寵斷於富貴之場可知兢奔  
於權賄之跖狐媚依攀憑勢而寵賂日章蠅  
營狗苟恣貪黷亂而廉耻盡喪鄉黨羞稱縉紳共  
鄙縱居閑散之地猶為汚玷於班行加茲憲臺  
之重何以克堪於任使伏乞

聖明俯察愚衷勿俞所擬仍

勅吏部從公看詳如果臣言不誣將趙文華亟行罷  
斥毋得顧望回護復使之覲面充位久玷

清朝所有前項撫治員缺另行推舉才望相應者  
疏名

上請庶名器不致於濫觴而邊方緩急為有賴矣

嘉靖三十二年八月初三日奉

聖旨吏部知道

陝西道監察御史臣王廷謹

題為乞亟罷姦佞強辯無耻大臣以勵臣節以昭聖斷以光

聖政事臣惟禮義廉耻立國之四維刑賞予奪君人之大柄匪四維以攝之則風流俗敗其潰靡極匪大柄以馭之則畜惡長姦其亂將大歷考古昔聖帝明王臻美當時垂休百世率由是道莫之有改也今

陛下明聖洞燭幽隱收攬威權親握大柄雖古帝王何以加之然

陛下之臣乃有不公不法冒姦惡以叨大位廷議亦

既暴白之矣

陛下亦既洞悉之矣而猶使之自決隄防自破廉耻  
强辯飾非覲顏在位是不能不吐露血誠仰望  
陛下早為之所也近該科道等官交章論劾吏部尚  
書汪鋐在任奸惡情狀該鋐自陳乞休節荷  
俞旨勉留臣仰見

陛下推誠待物以禮遇下一以全大臣進退之體一  
以養上人廉耻之節甚盛事也臣聞賈誼有言  
曰上設禮義廉耻以待其臣而下不厲節行以  
報其上者則非人類也汪鋐若果以禮義自防  
以廉耻自厲當不惡人言披瀝誠悃再四陳乞



必欲求去則

陛下優容之體大臣進退之義兩得之矣今汪鉉自陳畧無懇詞且強為飾辯大肆猖狂全無忌憚臣聞宋仁宗之時任用臺諫言及乘輿則天子改容事關廟廊則宰相待罪至今相傳以為盛事今鉉處

聖明之朝敢肆其奸佞貪鄙之狀掇拾奏辯欺藐朝廷天下後世其將謂何臣實不勝憤恚其汪鉉奸惡諸臣已悉言之臣不敢贅惟觀其奏辯之疏必欲上挾輔臣旁及僚友下連司屬以圖報復盤根固蒂之計人皆指為神奸鬼猾牢不

可破臣則知其實市井無賴小人之所為而鎡  
甘心為之決裂甚矣其辯諸臣劾已者俱指為  
挾私夫挾私與否臣不能知然使鎡平日果正  
大光明清白自持人雖欲挾私有言將以何為  
指實鎡不自引咎而惟欲以挾私一言鉗制言  
官之口古來姦臣肆惡堵塞言路皆此等之言  
為之也近聞其語人曰御史出外巡按自有許  
多政事當幹不在進言臣聞之實驚且駭此實  
李林甫專權誤國之術而鎡取以自用耳昔李  
林甫作吏部欲蔽塞人主視聽自專大權明  
廷諫官謂曰今明主在上群臣將順之不暇烏

用多言諸君不見立仗馬乎食三品料一鳴輒  
斥去悔之何及時補闕杜璉上書言事即黜為  
上邽令自是諫諍路絕而朝廷之士皆容身保  
位無復直言任李林甫之所為矣今錄以林甫  
自待臣不知其視

陛下為何如主也至於所言欲禁偽學此尤奸險兇  
惡輒敢無禮自有宋大儒闡明道學之統我

祖宗列聖及我陛下

聖聖相繼以道化民而於申

勅天下提督學校憲臣之諭猶拳拳焉道久化成天  
下之士方知講明義理砥礪名節有所倡而勉

於為善有所畏而不敢為惡今銖欲以此為禁  
將欲使人盡如銖貪昧無耻蠅營狗苟桎梏於  
貨利不顧禮義不惜廉耻然後為善耶何其不  
忠之甚也昔漢桓帝誤聽牢脩而有黨錮之禁  
唐文宗誤用訓注而有朋黨之禁宋哲宗寧宗  
誤信蔡京韓侂冑而有姦黨偽學之禁一時端  
人正士斥逐殆盡至今言之猶足酸鼻漢唐宋  
之天下竟以滅亡載在史冊一一可觀也今銖  
欲以誤

陛下臣不知其視

陛下為何如主也臣反覆觀銖之疏其姦惡無耻其

可槩見而

陛下猶不即斥去尚使供職者臣仰見

陛下之意欲存大臣之體以聽其自決耳然禮義可行於君子而黜罰當加於小人臣觀汪銖之意決不能自裁以義懇切求退仰承

陛下之休美何也臣有以驗之而知其必然矣往年汪銖在都察院科道諸臣嘗糾劾其姦惡至斥為面帶千層皮銖乃強顏就列動輒肆辯今復蹈之是

陛下之所知也不知累朝大臣被劾曾有此論辯否乎被劾人負不許論辯所以防奸徹壅故

祖宗重禁之今被劾論辯實自銖始此知其不能懇切于求退一也後遇吏部尚書員缺銖乃自陳才能獻於

陛下以求任用其轉吏部亦有疏

上陳臣猶記其語曰使臣十年不死得以十年在部而天下有不治者請斬首以謝不職之罪夫天官冢宰人物之權衡

陛下所慎重而不輕以授人者也苟非其人一日不可使居其位而況可以自售得之且使之十年在位乎銖之意不過歆媚假

靈寵招權納賄行私報怨以肆姦惡耳其為此言誠

溺於其中而不自覺也此知其不能懇切求退  
二也夫官階之可予可奪

陛下實主之也臣下何得而專之往年

陛下常有旨責吏部矣為汪鏐者自當輸情服罪祇

候明旨可也却乃先詣權門長跪乞憐且曰

汪鏐得吏部尚書是老先生與的全仗老先生  
扶持其跟隨官吏莫不掩口非議一時士夫傳  
以為笑雖卒以嫁禍而鏐之行檢蓋彰於人矣  
此知其不能懇切求退三也夫由前觀今則汪  
鏐姦鄙成性無耻自恣若非待

陛下明示譴發彼中貪昧隱忍趨榮慕祿且或不免

有長跪乞憐如昔日之所為者是不惟有負  
陛下待大臣之盛心其為汙

聖朝清明之化損 國家威重之體亦不少也孔子  
曰鄙夫可與事君也與哉其未得之也患得之  
既得之患失之苟患失之無所不至矣曾謂患  
失之鄙夫而可使之冒大位列

清班乎且家宰者百官之首也士風者治理之機  
也上古所以稱治者以士夫尚廉耻而風俗厚  
也後世所以不治者以士人寡廉耻而風俗薄  
惡也今之士風惟奔競交結阿諛趨諂之為務  
而禮義廉耻漫不知為何物若汪銓前後論列



幾數十疏且猶偃然在位恬不為恠談笑如故  
掇辯不已は無禮義廉耻之尤者也今其姦惡  
已敗露矣陛下若不亟去之則在

朝諸臣將亦倣效成風廉耻道喪實不知其所抵  
極故臣欲陛下亟去汪鉢者非有深讐宿怨  
於鉢實以百官表率之地非鄙夫壬人所宜久  
據而強辯無耻之臣尤非聖世所宜有正以  
導正習而勵臣節也孔子曰遠佞人記曰見不  
善而不能退退而不能遠過也是無非言斥邪  
遠姦實平治天下之大機括也伏願

陛下俯察陳言之奏深為治理之源察汪鉢奸佞欺

負之狀早為罷斥別選德望素著老成廉靜公  
清直亮大臣一員以充其任使凡內外大小臣  
工如有姦佞無耻如錦輩者決不容於

堯舜之世而相勉為善不敢效尤則士習可端風俗  
可正而太平清明之治可坐致矣實天下生民  
之幸

宗社無疆之幸臣冒瀆

天威無任惶悚待罪之至

嘉靖十四年九月初日奉

聖旨該衙門知道

禮科給事中臣孫應奎謹

題為乞斥大姦以除惡本以光

聖治事內開臣惟君之小人各以類聚而消長之機  
繫人主進退之何如故願治之君好善固篤而  
惡惡尤加嚴焉何也蓋君子以禮義為大閑求  
之不誠則未必輕進小人惟利祿之圖營營窺  
伺何所不至非深拒而痛絕之則寔繁有徒此  
小人所以常勝君子而亂之所以常多於治也  
然則進退之權容可不知所輕重乎昔曾參大  
賢也其傳大學之末章論平天下之道在潔矩  
繼之以公好惡均則貨矣又繼之以容賢利國

五十一  
妨賢病國之臣對言之以見得賢臣而治道斯  
舉然獨妨賢病國之臣則申之曰唯仁人放流  
之併諸四夷不與宗中國夫曾參繼推得賢為  
紮矩之要而尤諄諄於去惡若與之為仇者蓋  
狡獪一入則賢俊必無所容而禁伏兇人乃所  
以保安善人凡以平天下之道不越乎此也臣  
一介書生遭逢

聖明簡置諫垣惴惴終日常以無所補益為罪然竊  
觀時事若於曾參之說正今日所宜採擇者焉  
臣請昧死為

聖上陳之臣觀通者御史台日紳等感激思報忘其危

辱糾劾群小劉龍輩以効愚忠奉

欽依吏部從公看了來說臣不勝欣躍慶幸臣謂

陛下明目達聰察微燭隱洞破諸奸大開言路意

汪鏐者雖欲逆言官杜之口以自固陰黨諸臣而封植之結為腹心張其羽翼然必有所畏而不敢也及鏐將具本覆題揚言與部臣曰若欲去他每官寧去我官曲為餘說悉加褒美一時誼傳臣甚駭愕自古奸惡拂人好惡變亂黑白敢為朦蔽者以君之不能察也今

聖神御極離照中天猶肆無所忌如此不知視

陛下為何如主鏐固昔所無而今僅有之奸臣即欲

忘身奮擊陳於

丹陛既而思之奸弊昭白情狀畢露必為

聖明所燭而逆逐誅竄理所必加大奸數盡實天亡  
之矣臣坐不安席臥不安枕仰望

明旨逾於飢渴是月二十一日趨入本科聞鉅覆本  
已下臣即往吏科視之伏讀

御批盡正鉅之所罔而各區處之使群邪震疊四海  
聳觀臣歡幸喜悅不覺舞蹈嘆曰真

曠世盛事

大聖之所作為也非我

皇上聖學精一心源澄澈曷能無私好惡以建此

然愚臣竊有說焉凡此固王者重絕人之意  
去不若不知之為愈也方其君之未知則彼雖  
為惡尚懷顧忌曰君性仁未之知耳知之則禍將  
不可言及其既知猶疑不決誅逐不加則彼  
復將逞謀用智誣上以私殆無紀極延至大弊  
然後從而處之甚不迴一死然民禍以極國事  
已非亦已晚矣此理彰明不待慮而知者也今  
陛下於鉅既已知其奸登其隱其明亦極矣何不毅  
然遠去之以為天下大快而尚使之在位哉春  
秋大義君人者律令臣聞春秋無將若取之以

律鋹則鋹之誅當不遲之今日而

陛下猶未明法勅法豈將小懲而大戒以為小人之

福歟臣則以為

聖意曲成固無不至然鋹血氣既衰行險僥倖之機

已熟雖聖人與居不可化而入且人賞之可使

為善者而復罰之可使不為惡臣觀

陛下於鋹胥顧大臣之中挈冢宰之任排群議而用

之位長六卿封及三代加之以官保廕之以子

孫其委任恩寵亦云極矣

陛下之所以必為此者將以利其忠也苟有人心容

不匪躬鋹猶大為欺蔽若無關於



君父之休戚誠思積而不可解臣恐區區罰俸未必  
能為之懲勸以變其奸直將以縱其無忌憚之  
心耳臣意

陛下將無以錄其日為能勤且忠今特小失姑再試之  
而後絕之似歟臣則以為自古小人其得君秉權  
必有可觀之才必有可見之績但其心惟欲藉  
此以竊君之寵患得患失重負

君恩流禍且深他何足錄今錄於部事展入申出罔  
間寒暑誠不可謂不動也順承

意旨足稱任使誠不可謂不能也然積招物議怙終  
不悛身黨器小幟招邪佞可謂之忠乎惟其不

忠故斯勤也。祿足為奇事之壽。逞奸之具而已。  
人臣之罪。甚大。于不忠。尚可再試之耶。

陛下所賴以與其治者。人才也。銓衡之地。人才之端。  
縱秉執公正。或失不明。而邪正之權。低昂稍欠。  
猶足以為士習之害。敗亂之兆。况不忠如鉉。而  
可與之。朝居之也。臣知鉉不亟去。則風之所  
鼓。氣之所蒸。既不勝其漸染。而彼復以從違為  
禍福。以奪其所守。中人以下。將悉化為邪佞。  
陛下。一日萬幾。鉉之抑揚播弄。豈能一一而察之。亦  
可以為默識矣。然則

陛下欲得真才。以臻治理。可不汲汲於銓曹之也。

加之意乎臣請復以臣之所見者言之嘉靖十四年正月期當考察十二年冬正庶官入覲之期該身斯任其當知所欽飭亦明矣臣於十三年起復赴京十月內行至徐州以下道路傳呼咸謂汪公子來矣臣行數日果撐駕座舡牌榜吏部人爭走郡縣而奴隸之夫皂官快迎送接踵由沛縣至矣夫撫按二司監守一省猶且榜禁子姪親舊勿令過所屬如以考察論之則天下司府州縣孰非鉅屬而乃適期使子招搖於道途此何為哉餽遺滿載關節私通一時物議之沸騰真足以為清朝之辱也又請以臣之

償勞猶有說也大縣典史之缺悍然張主欲留  
以陞大驛驛丞其應選人員則沮抑久或反以  
窮絕驛分處之多致無所控訴姑乞

恩閑住遂使積年勤苦不得以享一日之榮豈我  
皇上欲使物各得其所之意哉衆口傳議謂亦惟視  
賄賂之有無為俯仰之頓異耳欺天罔人負

君誤國臣不知錄之所為何如也

陛下誠以睿明已照復即臣之所聞見者參之則錄  
果忠乎奸乎米可以不速去乎進退之幾臣知  
陛下不崇朝而決夫夫臣家居三載入科甫及數月

固非有積憤風然於鉞者也臣聞君之所愛臣亦愛之其在狗馬且然況大臣乎則欲相忘於無言者亦臣之心也比年以來又聞一忤鉞者則立中奇禍不然亦以計漸去其或僅存十無二三則臣亦誠危矣然臣不暇自顧猶諄復為陛下陳之以鉞之必去為快以去之不速為憂蓋君臣之義憂樂同之大奸當踞群枉門開冒瀆公器而爵祿不足以為天下勸庸非

陛下之所憂乎則臣亦焉能默以為容愁然自便耶  
伏望

陛下諒臣愚之匪他 俯採末議

大奮乾斷將鉞亟賜斥逐以絕奸謀仍乞

命下明正其罪 宣播於朝與衆棄之使天下曉然

知兇惡之斷不容於

聖代而千萬世之下永仰我

聖明之為不可及則天下幸甚

宗社幸甚臣愚不勝款款祈望之至

嘉靖十四年七月二十五日奉

聖旨該部知道

南京戶科等科給事中臣陸鳳儀等謹

題為督臣欺橫不法罪惡乞彰顯乞

聖明亟賜罷斥以肅臣紀以安地方事伏惟

皇上御天立極任賢輔理一時內外臣工罔不精白  
一心以承 休德間有一二恣肆不忠者皆出  
自 聖斷即時擯斥不使廁迹於 治朝此誠  
堯舜知人安民之道而萬年太平無疆之慶端  
在是矣然今之元兇巨蠹猶得以肆然一方長  
惡不悛未及去焉是共驩幸容於堯舜之時而  
地方之受其害者何限也臣等待罪戶兵二科  
事干錢糧兵馬有所見聞不容隱默竊照總督

浙直福建江西等處兵部尚書胡宗憲才不逮  
於共驩而兇則過之握兵八載于茲不思盡瘁  
竭忠以報 優眷之萬一而乃敢於欺

上罔下蠹 國害民無所不至雖累百牘未足以  
數其罪也臣等不暇他舉姑撫其前後數事大  
為公議所不容者試一一為

皇上言之前者海賊王直本與宗憲同鄉素相識善  
受其贈遺軍前所用蔡時宜蔣洲陳可願皆賊  
人姦細先於太倉州敗露被熊知州拏禁倖脫  
者宗憲乃倚為腹心使之往來賊中暗相約好  
嘉靖三十六年三月內王直勾領倭船六隻入



寧波府岑港約衆不過三千上岸四散抄掠燒  
毀房屋殺害居民不可數計而軍門但以招降  
為名按兵不擊及出新米酒肉以供饋之日費  
百金以上叅政劉燾屢請出師不聽甚為扼腕  
嘆憤賊住港內半洋彼此交貨往來無忌總兵  
官盧剛造其舟飲宴屢夕而廷宗憲乃預為賊  
具奏乞 赦其罪且欲以海防任之盟約已堅  
王直遂挺身來詣相見之際待以賓禮伴以指  
揮乘以肆轎任其自便畧無防禁此果何為者  
也幸賴我

皇上明見萬里斷以必誅宗憲始不得已倒牌將王

直送按察司收監復口諭按察使寬之在外蓋  
欲陰令之逸去而諉罪於該司也該司覺之不  
從其言雖王直卒正典刑而三千之衆竟通天  
誅人心憤憤無所以洩誰之咎歟而猶拚以為  
功叨竊殊恩橫行胞臆自立報功廟於吳山  
塑像其中飾虛侈繪無壁比於燕然勒石不以  
為恥果何以慰衆望而服人心也哉此宗憲之  
欺天冒功大罪一也上年江西報警賊亦熾  
矣宗憲屢奉明旨親詣會剿然竟不聞過江  
西一步延至十二月始為一出徒逡巡觀望於  
衢婺之間所過縣驛每於夜半取辦海味珍羞

稍有不前輒筆斃吏卒無數其驚懼而自盡者  
不知其幾矣彼何時也乃泄泄然自恣如是耶  
使非天威遐震而江西之諸臣併力則前寇  
何從而滅也即今福建盜賊尚爾紛紛興化福  
州之間皆倭寇也雖有巡撫游震得為經畧未  
能盡殄亦不聞宗憲協謀戮力一舉而匡攘之  
却乃晏然杭城府第與歌童妓女淫佚無度時  
或宴客遨遊西湖之上則以兵為戲自城門直  
抵湖山擺列軍士盛張旗甲以為觀美軍中有  
能彈射一禽一魚者賞以銀牌又或托稱燄火  
養重不出其視福建之賊肆毒三年恬不為意

近日巡按浙江御史張科屢侵之親往福建乃  
不得已於今年九月二十二日始離浙省猶復  
逗遛中途不急進也伺彼一捷則又將貪天功  
為己力耳然則前日之明旨屢下豈宗憲皆  
未之聞耶此宗憲之違旨玩寇大罪二也浙  
江自倭寇為孽錢糧除正賦外每歲加派田地  
山場稅銀共四十七萬五千九百兩名曰軍需  
是固不得已以救目前之急也而宗憲乃大肆  
侵蝕於其間主客兵徒張虛數支銷案卷莫可  
稽查已經給事中羅嘉禕御史龐尚鵬查獲糾  
劾計其冒破侵剋入已每歲當不下十數萬

邇來兩浙稍寧而連年大水滄浸民不聊生加  
派無已而侵費益厲宗憲之自為身家計也誠  
厚矣然其如民命何哉故兩浙素稱殷阜乃今  
則富者貧貧者逃且相率而為盜矣前春夏間  
衢婺嘉湖之民十百成群晝搶掠若更前而  
竭之以積總督之銀山而填宗憲之慾壑臣等  
切恐盜不在海上而在境內張璉林朝曦之事  
不可鑒乎此宗憲之剋剝為害大罪三也夫加  
派有四十七萬之多矣前此又奏取各省解到  
軍餉銀兩直隸一十九萬兩兩廣一十五萬兩  
以及南贛河南山東江西并湖廣等處亦幾百

萬軍門徑發批廻銀兩貯之杭州府庫以腹心  
寄之知府李景萃不用牌票惟口傳取用此銀  
係四十七萬之外文移不經布政司而亦科道  
查盤所不及者也彼四十七萬之數開除既無  
下落此銀更又作何支銷其與李景萃交通乾  
沒無疑矣又曾發銀二萬兩付鄉官嚴忠才坤  
買綿以賞倭為名求其不擾省城二人各將前  
銀盜匿入已竝無實綿一兩仍派湖州寧波二  
府出綿夫賞倭已非矣况又任二人者之侵盜  
乎盖其託為軍前贄畫皆敗名險行趨利附勢  
之徒雖有文墨全無行止宗憲與之日夜耽嗜

淫逸雖明知其侵匿不計矣如蔣孝如呂希周如田成法皆游古握槩出入軍門競為儻儻重費供給蠹財生事不可勝言此宗憲之糜費無紀大罪四也至於歲造段疋所以供

上用也浙江一省該派銀四萬三千四百八十一兩六錢宗憲妄為剋減乃令各府每銀一千兩扣解一百兩名為助軍前任金華府知府李一元扣解稍遲即以急急軍機叅論則各府孰敢有不順風附承者哉大約一歲扣除共銀四千餘兩即一歲而他歲可知矣計其前後所侵歲供銀兩奚啻數萬但機戶必得銀兩足數庶幾絲

造可供 上用宗憲既侵其十丁之價則段布  
濫惡不堪供用有由然矣如前年曾委嚴州府  
通判胡方監造卒以段疋不堪究平此宗憲之  
侵欺誤 國大罪五也且總督自有常俸又有  
廩給宗憲久住杭城該驛每日一小送三日一  
大送侈費亦已極矣及查浙江通省共三十九  
驛每歲為計處軍門供應事假以廩給名色派  
取通省驛分共計銀八百九十二兩八錢又杭  
嘉寧紹台溫六府每府各派銀八十兩金衢嚴  
處湖州五府各派銀八十二兩四錢通計各府  
派解共銀八百九十二兩零與各驛銀數相等



皆以供應軍門除省城不計外據各驛派解每  
歲供應共得銀一千七百八十四兩夫以總督  
之官既有省城之送供而又派之三十九驛既  
有三十九驛之派供而又倍取之於十一府是  
何供應之廣也不獨浙江為然今直隸江西福  
建各亦解供如之四省民力竭矣更何堪此其  
所差令人健步人等到驛每口糧一分折銀二  
兩馬一匹折銀一兩武林驛以此大書木屏宗  
憲屢至驛中雖目見之弗問也蓋已身罹剝取  
之事又安能禁其下之不效尤也故驛遞自南  
至北皆被此輩朋合赫詐所執皮套火牌不令

人看但口稱軍情緊急應廩糧若干馬匹若干  
任意網打勒騙慘酷猛於虎狼要皆軍門縱之  
使然貽害不小此宗憲之毒流驛傳大罪六也  
官爵之命出自朝廷總督雖專治一方命官  
豈得而擅耶宗憲但知財賄之可貪而不知明  
器之不可假如胡良瑞富商也因其送銀八百  
五十兩與之把總張曉里戚也因其送家鄉花  
園一片而授之揮使他若承差章廷桂先在溫  
州打死館夫已革而不用矣後以指揮戴冲霄  
引進即給之劄付發募兵五百名與其管領指  
揮祝壽麒納銀八百兩收貯賞功所以為公矣

次日取進私室給與把總劄付四道千總劄付一十六道隨賣與襲十九等得銀二千餘兩宗憲亦何故而私章廷桂祝夢麟賄入劄出如梓左券故凡納銀領劄而得冠帶者無慮數百皆為假虎之孤張威挾勢生事害人詐取財賄采以歸之宗憲此則其賣官通賄大罪七也又鄉宦茅坤旦夕與宗憲飲酒淫樂者也近日請杭州右衛軍器廠以為私宅宗憲竟不念務重大此廠非可以私授人者而乃輕徇茅之求茅坤遂圈圍廠界占為已有該衛軍士踣號呼曰

祖宗以來有此官廠一旦送人將來何處造軍器耶  
此則其以私戚公大罪八也兵隸督府本為地  
方防禦而設其不宜調用明矣上年夏間宗憲  
親男前往直隸應試乃發壯兵銃手一百餘名  
護送出境所過騷擾其隨行門子迨至崇德與  
鄉宦余田家僮爭效兇鬪致彼妓婦懼余自縊  
却乃專惑門子之言發兵七百槩擊爭所無辜  
平民數十餘人到院各加緹打八十當特殞命  
八人復欲羅織余田加以他罪使非布政使胡  
松力為救解則余田之冤抑又將無伸雪矣今  
年六月內強盜四日餘輩搶掠宗憲本亦聞有

銀山之富也宗憲得報輒差指揮張曉統帥神  
弩手及精兵五百名前往家鄉看守夫兵者

朝廷之兵也以之送子以之守家又以之為門子  
報讐何軍門之自便如此耶此則其私自調兵  
大罪九也居官以名檢為先雖在卑冗無敢踰  
越總督且瞻豈容湯發宗憲聞杭城鄉宦洪梗  
之女有殊色密託罷閑中書葉彰通意使洪梗  
就花園中置酒酣飲乃陽醉入內與女相見繼  
即以見禮銀一百兩致款竟不顧部民娶之為  
妻洪梗以是出入都府說事過錢倚勢逞威白  
奪人田地財物氣燄重灼自潘臬諸司以下無

不折節下之者甚至通事夷來住之妻倡婦人  
每令進府通霄不出或迷浹旬出則重以金銀  
賚之外人有告不准狀者皆此婦帶進批出又  
部下健步徐子明之妻亦以戴冲霄暗報常取  
進用與之比狎人視督府為宣淫之地矣此則  
其縱欲敗度大罪十也叅照總督浙直福建江  
西等處兵部尚書胡宗憲姦欺無比貪縱異常  
海上要功屢致言官之論劾閩中奏亂敢於  
明命之杭違志怠於宦成而恣意荒淫安有靖其之  
節權專於勢盛而擅作威福畧無臣子之忠剝  
數省以實一家東南之財力已竭盜

國賦以充私室兵民之怨憤難平任險詖以為慕  
賓積蠹滋其鬻名器以張鷟翅播害無窮軍廠  
送作人情奉公之意何在官兵調充私用守法  
之戒奚存沉湎酒色之場毀棄衣冠之寵官常  
大壞臣識盡陳負

國殃民莫此為甚此天下首惡人共以浙中大倭  
目之蓋不可一日復居總督之位者也伏望  
皇上俯鑒臣言

勅下廷臣再加查訪使臣等所論宗憲十罪一有不  
實是誣忠為欺將臣等坐以重罪以為言官委  
指之戒如果臣等所言不妄伏乞

聖鑒速將宗憲罷斥另相資望相應忠勤公慎者以  
代其任則庶乎督府得人四省賴以安息而  
皇上永紓南顧之懷矣臣等冒昧陳言無任殞越悚  
恐之至等因奏奉

聖旨吏部看來說